

Reinié Jouveau

Aièr



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Tistet Vedenò

Escrèure si souveni es rëndre testimòni d'uno vido que, coume touto vido, es tentativo de viéure, e, coume talo, a un coustat eisemplàri. De pèr lou mounde ounte sian nascu? de pèr lou mounde ounte sian esta abari e mounte avèn viscu, nosto vido es estado uno improuvisacioun unico qu'a, coume uno outro, soun pres.

L'istòri di Jouveau es uno istòri de paure, mai n'es pas uno pauro istòri. De mi grand Jouvau, ço que vuei me souvène lou miés, es soun inmènso bounta. Tant moun grand Auzias que sa femo Rousino èron de cor d'or e me sèmblo, acò, lou plus bèl eiritage que se posque souveta.

Moun grand èro de Caumont. Ero l'einat de siès. Moun rèire-grand, Gregòri, moun paire n'a parla dins «Toucant lou Vihadou», èro pegot e varlet de vilo. L'amista dóu foutougrafe Miesenzky, d'Avignoun, nous a vauqu d'avé de bèlli foutougrafio de moun rèire-grand e de sa femo. Es dous bèu vièi qu'aurien l'èr pulèu un pau reguergue. Sabe pas se ié sèmblo. Mai l'an que lou Flouregge decidè de metre uno placo sus l'oustau natau de moun grand Auzias, anerian quàuquis un à Caumont pèr nous entendre emé lou proupietàri dóu de l'oustau. Trouverian dous vièi en quau Damian, dóu Flouregge, diguè la resoun de nosto vesito. Alor, la vièio, se virant vers iéu me diguè:

— Mai vous n'en sias un de Jouvau.

La bravo femo aurié gaire poussu me faire mai de plesi.

Quand soun ome fuguè mort, ma rèire-grand venguè viéure à Vedenò emé mi grand. Aviéu dous o tres an, e me trinassave dins lis escalié di chambro pèr ana trouva la qu'apelavian «la pichoto mameto». Un matin, pamens, vouguère pas mounta coume à l'acoustumado: èro morto.

Es tambèn à Vedenò que mouriguè moun jouine fraire, dins aquel oustau que mi gènt apelavon l'oustau de Nourino. A coustat, i'avié un manescau que ié disiéu Tòu-tòu, e, en fàci, i'avié l'espiçarié. Oursoun ounte ai fa, pode dire, mi proumié pas, dins l'oudour carateristico alor dis espiçarié de vilage, dóu petròli. La chato de l'espiçarié, Marò, es un di persounage de moun enfanço que, se lis avien chausi pèr me faire ama l'umanita, lis aurien pas poussu miés chausi. Ai jamai rescountra quaucun de mai riserèu, de mai bon, de mai amable qu'aquelo Marò.

Moun grand avié pres sa retreto lou jour que i'avié agu dre. Lou mestié de pedoun, en Avignoun en aquelo epoco, èro penible. Pensas que moun grand pourtavo encaro de letro après soupa. Ma grand, emé si dous pichot, moun paire e sa sorre, quand lou tèms èro bèu, i'anavo à l'endavans quand s'entournavo emé sa bouito vuejo.